



SIARAN MEDIA

AKU WANITA@KRT PERKASA KESEDARAN WANITA, PERKUKUH SOKONGAN TANGANI KEGANASAN RUMAH TANGGA

KOTA BHARU , 6 Ogos 2026 : YBhg Datuk Dr. Maziah binti Che Yusoff, Ketua Setiausaha Kementerian Pembangunan Wanita, Keluarga dan Masyarakat hari ini telah merasmikan Program Advokasi Kesejahteraan Untuk Wanita @Keganasan Rumah Tangga (AKU WANITA@KRT) Negeri Kelantan di Renai Hotel, Kota Bharu anjuran Jabatan Pembangunan Wanita (JPW) di bawah Kementerian Pembangunan Wanita, Keluarga dan Masyarakat (KPWKM).

Objektif program ini adalah untuk meningkatkan kesedaran masyarakat, khususnya wanita, mengenai risiko keganasan dalam era moden termasuk bentuk-bentuk keganasan yang semakin kompleks.

Keganasan rumah tangga adalah satu bentuk jenayah serius yang mengancam keselamatan, maruah dan kesejahteraan institusi keluarga. Ia tidak hanya dalam bentuk fizikal, tetapi turut merangkumi penderaan emosi, seksual, ekonomi dan psikologi yang boleh meninggalkan kesan jangka panjang, khususnya terhadap wanita dan kanak-kanak.

Berdasarkan statistik Polis Diraja Malaysia, sebanyak 7,391 kes keganasan rumah tangga telah dilaporkan pada tahun 2025 berbanding 7,116 kes pada tahun 2024. Sehingga Jun 2026, sebanyak 4,014 kes telah direkodkan. Bagi negeri Kelantan pula, sebanyak 270 kes telah dilaporkan pada tahun 2026 berbanding 234 kes pada tahun 2025.

Sehingga 15 Julai 2026, sebanyak 8 program Aku Wanita@KRT telah berjaya dilaksanakan di 8 buah negeri dengan penyertaan seramai 2,786 orang peserta. Selain itu, melalui sesi K-Chat, seramai 166 orang peserta telah berjaya disantuni. Pencapaian ini mencerminkan sambutan yang amat

menggalakkan terhadap inisiatif dan program yang dilaksanakan oleh Jabatan Pembangunan Wanita (JPW) dalam memperkasa serta mendekati masyarakat, khususnya warga Kelantan.

Kementerian Pembangunan Wanita, Keluarga dan Masyarakat (KPWKM) melalui Jabatan Pembangunan Wanita (JPW) juga giat melaksanakan pelbagai program advokasi seperti kaunseling, Program Meningkatkan Daya Tahan dan Psikologi Wanita (Matahari), Program Literasi Perundangan dan Hak Wanita (IRIS) serta Skuad Waja sebagai rangkaian sokongan komuniti bagi memperkukuh usaha kesedaran, perlindungan dan bantuan kepada wanita.

KPWKM kekal komited dalam memperkukuhkan dasar, perundangan dan mekanisme sokongan dalam usaha menangani keganasan rumah tangga secara menyeluruh. Melalui pendekatan bersepadu yang melibatkan agensi kerajaan, komuniti dan masyarakat, Kementerian akan terus memperluas usaha advokasi bagi meningkatkan kesedaran, memperkasa wanita untuk tampil mendapatkan bantuan serta memastikan setiap mangsa menerima perlindungan dan sokongan yang sewajarnya.

UNIT KOMUNIKASI KORPORAT
JABATAN PEMBANGUNAN WANITA
6 OGOS 2026